

Date – 29/05/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Internet hmanga chhiah pekna portal Online Tax Portal Version 2.0 - “landtax.mizoram.gov.in” chu vawiin khan Revenue Minister Pu B. Lalchhanzovan a hawng.
2. School Education Minister Dr. Vanlalhlalan vawiin khan Govt Comprehensive Model School Aizawl-ah “New Age Tech Skills Centre” a hawng a, Hmarchhak biala a hmasa ber a ni .
3. Supreme Court chuan ramchhunga High Court zawng zawngte chu thla thum chhungin thutlukna tikhawtlai mekte siamfel vek turin a ti.
4. PM Surya Ghar Scheme chuan bung thar kaiin rampumah chenna in nuai 40 ah rooftop solar dah a ni tawh

<><><>

ONLINE TAX PORTAL

Internet hmanga chhiah pekna portal Online Tax Portal Version 2.0 - “landtax.mizoram.gov.in” chu vawiin khan Land Revenue & Settlement Minister Pu B. Lalchhanzovan a hawng.

Pu Lalchhanzova chuan a hmuna khawn ngai lova mipuite’n mahnia awlsam zawka chhiah an pe thei tawh tur chu lawmawm a tih thu a sawi a, khawvelin chankanna kawngah ke a pen rualin Mizo mipuiten an pen ve zel thei a ni, a ti. Ram hmasawn leh hnam zahawm ni thei turin mipuiten chhiah an pek tam a, an pek that a ngai, a ti bawk.

Land Tax leh Zoramchhiah pekna atana record pawimawh Ration Card Number leh Phone Number link thar emaw link that ngaite tan office kal kher ngai lovin portal hmangin a thehluh theih tawh dawn a. Land Tax pe tur tan Family ID hmanga pek a ngai tawh dawn a, mahni Family ID la hrelo tan portal ah hian a zawna dah a ni. Lawngtlai leh Siaha District tih loh chu District zawng zawng an onboard tawh a, district onboard tawh zawng zawng te chuan online hmangin Land Tax leh Zoramchhiah an pe thei tawh dawn a ni.

<><><>

GOVERNOR

Larsap General (Retd) Vijay Kumar Singh-an vawiin khan Post Matric Scheduled Tribe Scholarship Scheme hnuaiia hamthatna dawngtu zirlaite chu Durbar Hall, Lok Bhavan-ah a kawm a. He inkawmhona hi Janjatiya Garima Utsav 2026 hnuaiia "Birsa Lives in New Bharat Week" kaltlanga buatsaih a ni.

Larsap chuan Sawrkar laipuiin tribal-te hmasawn nan theihtawp a chhuah thu sawiin, zirlaite chu tribal scholarship leh scheme dangte midangte hrilh hriaa theh darhtu Ambassador nih tum turin a fuih a. Tribal-te zirna chawisan nan school tha tak tak Eklavya Model Residential School, Jawahar Navodaya Vidyalaya leh Kendriya Vidyalaya-te chhawr tangkai a tul thu a sawi bawk.

Zirlaite chuan Post Matric Scheduled Tribe Scholarship Scheme siamtu Sawrkar chungah lawmthu sawiin, abik takin chhungkaw harsa leh thingtlanga chengte tan a tangkai lehzuul thu an sawi a. An tawnhriat leh harsatna neihte sawi chhuah theihna hun tha tak siam saktu Larsap chungah lawmthu an sawi bawk a. Scholarship chuan result tha nei tura mawhpurhna a pek mai bakah sawrkar scheme duante chu mipui hamthatna tur a ni tih an hriat chian lehzuul thu an sawi a ni.

Larsap hnena zirlai ten harsatna an thlen zingah hian a hun taka scholarship a lut thin lo chuan admission fee, zirlaibu leina leh tul dangah harsatna a thlen thute, zirna senso sang zela scholarship pung ve se an duh thute, online application awlsam leh rang zawk bakah Aadhaar leh bank account thlunzawma harsatna tawhte an thlen a. Scholarship bik buaipuina tur help desk bank branch zawng zawnga dah an duh thute, tribal zirlai ST Scholarship dawng theite hmaih an awm loh nan awareness campaign nasa zawka neih tha an tih thute bakah, form submit laia senso awmte tih bo emaw, tih tlem nise an duh thute an thlen a ni.

<><><>

EDU MINISTER

School Education Minister Dr. Vanlalhlalan vawiin khan Government Comprehensive Model School, Model Veng, Aizawl-ah Hmarchhak biala a hmasa ber "New Age Tech Skills Centre" a hawng.

He centre hi Bharat Forge Ltd. CSR (Corporate Social Responsibility) atanga din a ni a. New Age Tech Skills Centre hi Mizoram leh Northeast pumpuiah school level-a technology skills lab hmasa ber a ni a. Bharat Forge CSR support leh SimuSoft Technologies technical expertise hmangin zirlaite chuan Artificial Intelligence (AI), Robotics, Internet of Things (IoT), 3D Printing, CAD, CNC Simulation leh Drone Technology ang chi technology tharte an zir dawn a ni.

He hmalakna hi National Education Policy (NEP) 2020 thiltum tihpuitlinna atan classroom-a zirna leh industry-relevant practical technical education inkara inthlunzawmna pawimawh tak a ni a. SimuSoft Technologies chuan school zirlaite atan AI curriculum leh textbook bik pawh an siam a, chu lehkhate pawh chu programme-ah hian tlangzarh a ni bawk.

<><><>

MIZO TAXI APP

Mizorama Passenger phur chi lirthei-a chuang thin te'n Sorkar approved rate diktak an chawi theihna atana Mizoram leh Digiride Technology Pvt. Ltd., NIT(Mizoram) te tangkawpin an duan Mizotaxi mobile app chu peih fel a ni a.

Vawiin khan Secretary State Transport Authority Mizoram chuan thuchhuah siamin Sorkar duhdan angin Aizawl khawpui chhungah bul tan phawt tur a ni ang a, a tahtawlin District dangah pawh kalpui chhoh zel tum a ni.

Aizawl khawpui chhungah hian 'Mizotaxi' app hi July ni 1 atangaga hman tan tur a ni a, Aizawl khawpui chhunga service lai 4-wheeler taxi te, 2-wheeler taxi leh Autorickshaw zawng zawng te chu June 2026 chhungin Mizotaxi Office, DTO(L.A) Office hnuai, Transport Complex, Chaltlangah registration tifel vek tura tih an ni.

<><><>

PHE MINISTER

PHE minister Prof. Lalnilawma chuan Aizawl khawpui tui tlan ber Tlawng lui tui pump-na pakhat, Greater Aizawl Water Supply Scheme Phase-I tui pump khawl awmna chu tui lianin a chim phak loh tura a awmna hmun tihsan hna thawh a nih dawn avangin duh anga tam tui pump theih a nih dawn loh a ti a; Aizawl mipuite chu tui ren tur leh fur ruahtui khawl turin a ngen.

Naktuk May ni 30 atangin Phase-I khawl hi metre 5 vela sangin chawisan hna thawh tan a ni dawn a, thla 6 atanga thla 9 inkar vel chhunga thawh zawh theih beisei a ni, a ti.

Tui pump khawl awmna hmun chawisan hna thawh chhung hian Phase-II leh Phase-III hmang chauhin tui a pump theih rih dawn tih sawiin Prof. Lalnilawma chuan, tui sem dan chu a pangngaiin ni 10 danah zel kalpui tum ala ni a, amaherawh chu mipuiin tui an dawn zat erawh a tlem deuh dawn, a ti a; mipuite hriatthiamna ngenin, tui ren tur leh fur ruahtui khawl turin a ngen nghal a ni.

Prof. Lalnilawma chuan Greater Aizawl Water Supply Scheme Phase -III, Setlak tui pump-na khawl pawh tuilianin a chim phak loh tura dahsan tho tur a nih thu a sawi a; hna hi thawh tan mai tura peihfel ni tawh mah se, mipui hnena tuisem a khaih lak nasat lutuk loh nan Phase-1 hna thawh zawh hnua thawh tan turin an in ruahman ta zawk tih a sawi bawk.

<><><>

WORLD NO TOBACCO DAY

Khawvel pum huapa vaihlo leh a kaihnawih do na ni World No Tobacco Day chu remchan zawkna avangin vawiin khan Mizoramah hman a ni a. National Tobacco Control Programme Mizoram te buatsaihin District hrang hrangah hman a ni.

World No Tobacco Day hi Aizawl-ah chuan DHME Auditorium ah hman a ni a, he huna tarlan anih dan chuan, Health Dept-a thawktu te, Teacher te, Dan kengkawhtu te leh Ngo pawl hrang hrangah Zuk leh hmuam that loh zia inzirtirna training wawi 107 buatsaih tawh niin Awareness Programme School leh Institution hrang hrangah wawi 204 nei tawh a ni a, meizuk phallohna hmuna meizu mi 7580 man an nih thaw

thu a sawi a. E-Cigarette (Vape) chi hrang hrang leh hriselna atana a that loh zia a sawi bawk.

<><><>

LALHLUPUIA PTC PASSED AWAY

Akashvani Aizawl Regional News Unit-a Champhai District Part Time Correspondent Pu Lalhlupuia chu tukin dar 7 leh a chanve khan Champhaiah a thi a, kum 65 mi a ni.

Pu Lalhlupuia hi cancer natna avangin hun engemawchen enkawl a ni a, vawiin chawhnu dar 3 ah a chenna in Champhai Venglai ah vui a ni a, Regional News Unit chuan a sunna hun hi hmangin ngawi rengin minute 1 an ding a ni.

RNU chuan kan thawhpui Pu Lalhlupuia kan chan ta hi lungchhiatthlak kan tiin kan ui hle a, Pu Lalhlupuia hi thuthar lak khawm leh thehdarh lama mi taima leh thawh hlawk tak a ni a, kum 30 chuang kan thawk ho a, Radio tana a hnathawh chhuanawm tak hi kan hre reng ang. A kalsan tak a nupui leh fate leh a laináte zawng zawng Pathianin awmpuiin thlamuan rawh se.

Chief Minister Pu Lalduhoma chuan a ui thu sawiin sorkar thuthar thehdarh kawngah te, sorkar leh mipuite inlaichinna tha din kawngah te, a bik takin Champhai leh Champhai district chanchinthar pho chhuahna kawngah te a thawh hlawk hle a. A hnaah a tuiin a inpe a, a entawntlak em em a ni a ti.

Mizoram Journalist Association pawhin an ui thu sawiin, Journalist hmasa Pu Lalhlupuia, tuna Champhai Dist. MJA President ni mek in ram tana a hnathawh te an hre reng an ti a, a kalsan, a chhungte leh Champhai Dist. MJA Lalpa'n awmpuiin thlamuan se an ti a ni.

Home Minister Pu K Sapdanga, Information & Public Relations Minister Pu B Lalchhanzova, Adviser to Chief Minister Pu H Ginzalal leh Political party hruaituten an ui thu an sawi bawk a ni.

Pu Lalhlupuia hi Kum 1992 April ni 1 ah All India Radio Aizawl Regional News Unit hnuaiah Part Time Correspondent-ah a thawk tan a, kum 34 chung AIR Chanchinthar-a a thawh chung hian a thawhhlawk hle a, kum khat mah chawl lovin chanchinthar hmanga mipui chawmtu zingah a tel a ni. Chanchinbu lamah pawh sulhnu ngah tak niin, zirtirtu hna bansanin, Chhawkhlei Daily Newspaper leh Chuailo Daily Newspaper (Lenrual chanchinbu ni ta) te a enkawl a. Kum 1998 ah Champhai Journalist Assn. (CHJA) dintutute zingah telin Secretary i/c. Organisation hmasa ber a ni MJA Champhai District hruaitu hlun niin, President ah ngawt pawh kum 1991, 2000, 2010-2012, 2014-2016, 2024-2026, 2026- vawiin thlengin a chelh a ni. Mizoram Sorkarin Accredited Journalist a puante zingah telin, Sorkar bultumin Press Tour hrang hrangah a tel thin a, kum 2011 khan Assam leh Arunachal Pradesh, 2016-ah New Delhi, 2019-ah Nagaland, 2023-ah Sikkim-ah te a kal a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

SUPREME COURT ON HIGH COURT

Supreme Court chuan ramchhunga High Court zawng zawngte chu thla thum chhungin thutlukna tikhawtlai mekte siamfel vek turin a ti. Vawiin khan Chief Justice Surya Kant leh Justice Joymalya Baghchi te chuan he thutlukna hi siamin court rorel tikhawtlai chuan thil pawl tak a thlen thei a ti a. Thutlukna rang taka siam chu a pawimawh thu sawiin bail dilna te chu a ni ah pek chhuah nghal anih loha tikhawtlai anih chuan a tuk ah tihfel ngei tur a ti a. Bail dilna emaw hremna thupek siam anih dawnin jail thuneitute hnenah puan anih ruala hrih nghal zel tur anih thu Court chuan a sawi a. An chungthu ngaihtuah mek Under-trial convict te chu a ni ah emaw a tukah chhuah nghal zel tur an nih thu a sawi bawk a ni.

<><><>

ENERGY

PM Surya Ghar Scheme chuan bung thar kaiin rampumah chenna in nuai 40 ah rooftop solar dah a ni tawh. Union Ministry of New and Renewable Energy Minister Pralhad Joshi chuan social media he thu hi puangin India chuan energy thianghlim siam kawnga a zinkawngah dinmun pawimawh tak a thleng a ti a. He renewable energy hmalakna hnuaiah khua leh tuite chu a hmangraltu ni tawh loin a siamchhuaktu ah an tang tawh a ti a. Chhungkaw tam tak tan electric hman man a tihhniam thu sawiin sawrkar subsidy chhawr tangkaiin electric bill pawh chawi ngai lo khawpin an awm thei tawh a ti a. Energy lama intodelh turin kawng a zawh mek tih sawiin Viksit Bharat hmathlir tihlawhtling turin kawng a zawh mek a ti bawk.

<><><>

PM MANN KI BAAT

Prime Minister Narendra Modi chuan Pathianni May ni 31 chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 134-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>